

原輯南嶽志廿六卷

衡山志

南嶽志卷三

平江李元度原輯衡山王香余校刊
歐陽謙

形勝

凡志山志形勝也嶽之勝在七十二峰非絕人事裏糧作數月遊惡克窮其勝哉登臨紀勝之詩文凡因地而作者悉附本條之下俾覽者當臥遊焉宋范成大吳郡志實開此例其後張鳳鳴作桂勝董斯張作吳興備志朱彝尊作日下舊聞考皆因之提要稱其典雅不虛也今亦全仿其例云

南嶽衡山在衡州府衡山縣治西北書五曰南巡狩至于南岳如岱禮注南岳衡山也又岷山之陽至于衡山尚書荆州其山鎮曰

衡山注南嶽之鎮曰衡以其分當軫翼亢輔紫宸上列注生之宿
下符長育之功稱物平施故謂之衡山海經衡山一名岵嶁山其
上多青鸛鳥多鵠鵒爾雅釋山江南衡郭璞注衡山南嶽也又霍
山爲南嶽邢昺疏風俗通云衡山一名霍言萬物霍然大也地理
志云衡山在長沙湘南縣南漢武帝移江南霍山之祀于此故又
名霍山其經之霍山卽江南衡是也故上注云衡山南嶽也後漢
書郡國志衡山在東南注山別名岵嶁續博物志衡山五嶽之南
嶽也黃帝以瀦霍爲山之副爾雅云霍山爲南嶽至漢武以衡山
道遠徙祭于廬江潛山或曰衡山卽霍山也南嶽記衡山者五嶽
之南嶽也其來久矣至軒轅氏乃以瀦霍之山爲副焉爾雅霍山

爲南嶽蓋因其副也及漢武南巡又以衡山遼遠道隔江漢乃徙南嶽之祭于廬江灊山亦承軒轅副義也南嶽衡山本朱陵之靈臺太虛之寶洞上承軫宿銓德鈞物故稱衡山下踞離宮攝位火鄉赤帝館其嶺祝融宅其陽威神堂堂陰映我我是以宅敷神靈寶宇仙羅號爲南嶽其山盤繞八百里上如車蓋及衡輓之形高四千一十丈山有七十二峯迴雁爲首嶽麓爲足東南臨湘川遙望如陣雲沿湘千里九向九背唐書天文志星紀鶉尾以負南海其神主乎衡山熒惑位焉潛確類書南嶽衡山以霍山灊山爲儲副天台勾曲爲佐理又曰南嶽山上有飛瀄懸水激石飛湍百仞卽孫溫伯所喪身處也又有曲水壇水行石上成溝瀆如世人臨

河壇也三月三日時來逍遙洞淵集衡山洞名朱陵太虛之天卽神農爲赤帝治南嶽者昔上帝降玉冊寶印賜注生眞君永鎮靈嶽卽吾皇比壽之山上應翼軫璣衡之精下鎮楚地之分野道典黃帝命瀟山爲南嶽儲君拜青城爲丈人署廬山爲使者五嶽經匡廬麻姑玉笥洞陽大圍九疑羅浮等山爲南嶽佐命星經玉衡主荊州而長沙一星在軫中主壽長子孫昌亦曰壽昌之次衡嶽舊屬長沙故又稱壽嶽水經注湘水又北逕衡山縣東山在西南有三峯一名紫蓋一名石困一名芙蓉芙蓉峯最爲竦傑自遠望之蒼蒼隱天故羅含云望若陣雲非晴霽素朝不見其峯丹水涌其左澧水流其右山經謂之岫巉爲南嶽也衡山東南二面臨映

湘川自長沙至此江湘七百里中有九向九背故漁者歌曰帆隨
湘轉望衡九面山上有飛泉下注下映清林直注山下望之若隔
練在山矣九域志衡山七十二峯祝融紫蓋雲密石廩天柱五峯
爲最大云湘中記宿當軫翼度應璣衡故曰衡山衡山如陣雲沿
湘千里九向九背山有錦石斐然成文有懸泉滴瀝崑間聲泠泠
如絃有白鶴迴翔其上如舞元和郡縣志山在縣西三十里太平
寰宇記衡山澧水所出桐柏之連岡也述異記南嶽爲盤古右臂
楊升庵集衡嶽一名芝岡衡嶽記威神堂堂陰暎我我宅藪神靈
室宇仙羅總勝集衡嶽者五嶽之一周官所謂荊州之鎮又夏書
所云宛委山也自下而上九千七百三十丈東至洞陽西抵白鶴

雲陽面其南大圍踞其北石鼓乃朱陵之西門青草是衡山之左腋衡之脈發於岷山由蜀入黔迢遞九疑聯絡五嶺爲南方之幹自騎田嶺入楚盤紆八百餘里特起南嶽在衡州府衡山縣境西入衡陽縣境

今析爲清泉

北入湘潭縣境又北入善化縣境西北接湘

鄉縣境東南二面以湘水爲界西以蒸水爲界北以興樂江爲界由縣治至嶽廟三十里由嶽廟至絕頂祝融峯亦三十里計祝融之前爲峯十有六曰軫宿曰碧蘿曰芙蓉曰煙霞曰獅子曰擲鉢曰集賢曰天柱曰華蓋曰安上曰雲居曰紫雲曰赤帝曰朱明曰喜陽曰駕鶴祝融之後爲峯十有三曰青岑曰翠鷺曰金簡曰雲密曰棲貞曰仙巖曰石困曰側刀曰祥光曰雷祖曰碧雲曰白石

曰永參祝融之左爲峯十有二曰紫蓋曰香爐曰期日曰惠曰曰
瑰宵曰靈藥曰白雲曰九女曰雲隱曰耆闍曰靈禽曰靈應祝融
之右爲峯十有九曰石廩曰天堂曰瑞應曰觀音曰永和曰紅花
曰仙頂曰雲龍曰明月曰雙石曰妙高曰天臺曰蓮花曰潛聖曰
會善曰會仙曰降真曰文殊曰岫巖祝融之東峯之遠者凡六曰
吐霧曰巾紫曰白馬曰採霞曰曉霞曰鳳凰而鳳凰爲更遠祝融
之北峯之遠者凡四曰日華曰碧岫曰屏障曰嶽麓而嶽麓爲最
遠祝融之南峯之最遠者一曰回雁合之爲七十二峯峯之最大
者五祝融紫蓋雲密石廩天柱也又有洞天二第三曰朱陵太虛
小有之天在水簾洞第三十三曰紫光洞照之天在紫蓋峯福地

四曰洞真墟曰青玉壇曰光天壇曰洞靈源有境二白雲峯西青
岑峯東其形九向是曰聖境朝日峯北岫巉峯南其形九背是曰
靈境有門六大洞爲東門兜率潭爲南門石鼓洞爲西門龍王潭
爲北門白雲潭爲東便門洞門觀爲西便門有洞十五巖三十八
泉二十五溪九池九潭九井九府志自迴雁至仙頂七峯在衡陽
縣境其吐霧碧岫屏障曰華嶽麓五峯則在長沙府屬湘潭善化
縣境自祝融至天柱五峯及巾紫金簡降眞芙蓉等五十五峯并
在衡山縣境一統志衡與霍本二山因霍山爲衡山之副故爾雅
於霍山亦有南嶽之稱邢疏謂衡與霍一山有二名殆出於傳會
之說縣志案衡嶽五峯流傳已久杜詩祝融五峯尊是也嶽志數

芙蓉不數雲密一統志數雲密不數芙蓉未知孰是然芙蓉較雲密爲尤高又吐霧峯一統志謂在長沙府界實在衡山縣治後又七十二峯迴雁爲首嶽麓爲足舊有是說或嶽麓不在七十二峰之數當增入彌陀一峯亦未知是否至仙上卽仙頂紅花卽石榴華蓋卽靈芝獅子卽柿蒂降元卽降真天柱卽雙柱日華卽日蓋朝陽卽朝日駕鶴卽紫霄採霞卽應相祥光卽鶴鳴皆一峯二名互見諸書惟觀音與碧蘿本二峯且相去甚遠而湖廣通志乃云觀音峯一名碧蘿峯則誤矣

晉桓元遊南嶽詩序歲次降婁夾鍾之初理檝將遊於衡嶺涉湘千里林阜相屬清川窮澄映之流涯涘無纖埃之穢修途逾

邁未見其極窮日所經莫非奇趣姑洗之旬始暨於衡嶽於是
假足輕輿宵言載馳軒塗三百山徑徹通或垂柯跨谷挾巘交
蔭或曲溪如塞已絕復開或乘車長嶺邈眺望或憩輿素石
映權水湄蓋欣然奔悅求路忘疲者觸事而至也仰瞻翠標邈
爾天際身凌太清獨交霞景周覽既畢頓策舄阿管絃並奏清
徽再響思古永逝神氣未言

宋張栻遊南嶽唱酬序栻往來湖湘踰二紀寢寐衡嶽之勝亦
嘗寄跡其間獨未登絕頂爲歉也乾道丁亥秋新安朱熹元晦
來訪予於湘水之上留再閱月將道南山以歸乃始偕爲此遊
而三山林用中擇之亦與焉粵十有一月庚午自潭渡湘水甲

戍過石灘始望嶽頂忽雲四合大雪紛集須臾深尺許予三人者飲道旁草舍人酌一巨盃上馬行三十餘里投宿草衣巖一時山川林壑之觀已覺勝絕乙亥抵後嶽丙子小憩甚雨暮未已從者皆有倦色湘潭彪居正德美來會亦意予之不能登也予獨與元晦決策明當冒風雪亟登而夜半雨止起眎明星燦然比曉日升暘谷矣德美以怯寒辭歸予三人聯騎渡興樂江宿霧盡捲諸峯玉立心目頓快遂飯田心易竹輿由馬跡橋登山始皆荒嶺彌望已乃入大林壑崖邊時有積雪甚快溪流觸石曲折有聲琅琅日暮抵方廣氣象深窈八峯環立所謂蓮華峯也登閣四望雪月皎皎寺皆板屋問老宿云用瓦輒爲冰雪

凍裂自此如高臺上封皆然也戊寅明發穿小徑入高臺寺門
外萬竹森然間爲風雪所折清爽可愛住山了信有詩聲云夜
月明牕牖間有猿嘯清甚出寺卽行古木寒藤中陰崖積雪厚
幾數尺望石廩如素錦屏日下照林間冰墮鏘然有聲雲陰驟
起飛霞交集頃之乃止出西嶺過天柱下福巖望南臺厯馬祖
菴由寺背以登路亦不至甚狹遇險輒有磴可步陟踰數十里
過大明寺有飛雪數點自東來望見上封寺猶縈紆數里許乃
至山高草木堅瘦門外寒松皆拳曲臃腫樛枝下垂冰雪凝綴
如蒼龍白鳳然寺宇悉以板障蔽否則雲氣噓吸其間時不辨
人物有窮林閣侍郎胡公題榜蓋取韓子雲壁潭潭窮林攸摧

之語二友始息肩望祝融絕頂褰裳徑往頂上有石可坐數十人時煙靄未盡澄澈然羣峯錯立遠近異態其外四望渺然不知所極如大瀛海環之真奇觀也湘水環帶山下五折乃北去寺僧指蒼莽中云洞庭在焉晚居閣上觀晴雪橫帶千里夜宿方丈月照雪屋寒光射人泉聲隔牕泠然通夕恍不知此身踞千峯之上也已卯武陵胡實廣仲范彥德伯崇來會同遊仙人橋路竝石側足以入前崖挺出下臨萬仞之壑懍懍不敢久駐再上絕頂風勁甚望見遠岫次第呈露比昨觀殊快寒威薄人呼酒舉數酌猶不勝擁氈坐乃可支須臾雲氣出巖復騰湧如饌餽過南嶺爲風所飄空濛杳藹頃刻不復見是夜風大作庚

辰未曉雪擊牕有聲驚覺將下山寺僧亦謂石磴冰結卽不可步遂亟由前嶺以下路已滑甚有跌者下視白雲滄溟瀾漫吞吐林谷真有盪胸之勢欲訪李鄴侯書堂則林深路絕不可往矣行三十里許抵嶽市宿勝業寺勁節堂蓋自甲戌至庚辰凡七日經行上下數百里景物之美不可殫敘間已發於吟咏更迭唱酬倒囊得百四十有九篇雖一時之作不能盡工然亦可以見耳目所歷興寄所託異日或有考焉乃哀而錄之方己卯之夕中夜凜然撥殘火相對念吾三人是數日間亦荒於詩矣大抵事無大小美惡流而爲不反皆足以喪志於是始定要束翌日當止蓋是後事雖有可歌者亦不復見於詩矣嗟夫覽是

篇者其亦以吾三人者自儆乎哉

宋朱子南嶽遊山後記南嶽唱酬訖於庚辰敬夫既序其所以然者而藏之矣癸未發勝業伯崇亦別其羣從昆弟而來始聞水簾之勝將往一覩以雨不果而趙醇叟胡廣仲伯逢季立甘可大來餞雲峯寺酒五行劇論所疑而別丙戌至櫛州熹伯崇擇之取道東歸而敬夫自此西還長沙矣自癸未至丙戌凡四日自岳宮至櫛州凡百有八十里其間山川林野風煙景物視向所見無非詩者而前日既有約矣然亦念夫別日之迫而前日所講蓋有既開其端而未竟者方且相與思繹講論以畢其說則其詩固有所不暇者焉丙戌之暮熹諭於眾曰詩之作本

非有不善也而吾人之所以深懲而痛絕之者懼其流而生患耳初亦豈有咎於詩哉然今遠別之期近在朝夕非言則無以寫難喻之懷然則前日一時矯枉過甚之約念亦可以罷矣皆應曰諾既而敬夫以詩贈吾三人亦各答賦以見意熹則又進而言曰前日之約已過矣然其戒懼警省之意則不可忘也何則詩本言志則宜其宣暢湮鬱優游平中而其流乃幾至於喪志羣居有輔仁之益則宜其義精理得動中倫慮而猶或不免於流况乎離羣索居之後事物之變無窮幾微之間毫忽之際其可以熒惑耳目感移心意者又將何以禦之哉故前日戒懼警省之意雖曰小過然亦所當遏也繇是擴充之庶幾其寡過